



黔草卷七目錄

奏疏

協剿皮林招降九股疏

調補各道以便經理疏

請監軍楊 卹典疏

恭報災異疏

銷筭漕糧餘米賑饑疏

考覈給由縣官疏

協剿皮林九股餉銀疏

續獲謝朝俸等正法疏

請增易 勅書疏

題叅長沙逋餉疏

奏繳播州五司印信疏

請補總兵疏

經理會疏略

考覈給由府官疏

係蜀者不
書故曰畧

續衣生黔草卷之七

泰和郭子章相奎甫著
友人楊寅秋義叔甫校

奏疏

協剿皮林招降九股敘功疏

題為皮林蕩平有期黔師堵截無虞恭報斬獲功級并
獻九股等寨內附戶口文冊以昭 皇仁以綏邊圉事萬
曆二十九年三月十八日據貴州監軍道副使袁應文紀
功督餉道右叅議張文奇呈准貴州總兵官李應祥手本
移稱本年三月十六日據副總兵陳寅揭報奉令督同都

司徐成坐營中軍劉岳汪如淵原任守備童龍伍萬鍾史良將贊畫黃龔李師沆葉定遠蔣玉成劉漢徐一夔張爾知劉恩旗鼓把總易之謙陳正邦土同知蒙詔武生王治安提調把總李占先吳文秀陳猷華統鄭國明陳定侯仕芳督陣旗牌官馮邦濟劉英汪瀾等協剿皮林天甫叛苗跟踪追蹙於十五日五鼓至巴野險寨惡賊拒敵官兵分三大枝分途接殺直至日午共報斬獲真苗首級一百三十六顆奪獲盔甲刀弩等項各賊退據後山時因日暮收兵二十二日據副使袁應文呈准總兵官李應祥手本移據副總兵陳寅呈報奉令督同都司徐成坐營劉岳汪如

淵守備童龍等協剿皮林天甫於本月十五日前至巴野當有惡苗數千餘人協助皮林拒敵官兵分途接殺斬獲功級餘賊遁入山箐結連附近各寨阻絕道路官兵連日追剿直入深山不憚攀崖附壁不避迅雷暴雨奮勇於十七十八十九等日連破鬼懷石弄絞隴絞蒙絞稍等寨據各報稱當陣斬獲真苗首級一百八十四顆奪獲器械一百二十件合行塘報二十四日據副使袁應文呈准總兵官李應祥手本移據副總兵陳寅呈報六甫等寨懸崖茂箐恃險窩藏巴野各處遁賊當差把總吳應龍偵探非潛師暗擊不得收功於二十一日會徐都司密議以把總陳

定等統兵先抵因州寨伏兵以絕賊後路分徐都司統守
備史良將提調把總華統徐大綬等兵以攻其左分坐營
汪如淵守備童龍伍萬鍾統中軍提調劉恩等兵以攻其
右本職自統賚畫中軍把總黃龔李師沉葉定遠等土同
知蒙詔等兵以衝其前分坐營劉岳李棟材統將玉成等
兵四路邀擊以防其援約定本日四鼓抵寨五鼓齊攻且
申先登之令嚴後至之誅三路官兵如期會集令火器把
總楊綸領火器手至寨外用百子鳥銃火箭攻打賊出拒
敵三路夾攻賊不能支退入後山欲遁因州人兵衝擊賊
知不免多挈男婦從崖自墮屍相枕藉因萬石懸崖不能

取級據各報稱共斬獲真苗首級九十七顆拜奪獲器械
八十九件合行塘報又據副使袁應文呈准副總兵陳寅
手本據都司徐成領兵至頗洞劄營惡苗前來衝敵把總
鄧國明等斬獲首級二十七顆署都清守備童龍於清水
江營陣斬獲首級七顆把總吳應龍顯華徐可上護糧
於桃場寨斬獲槍糧苗級貳顆又據副使袁應文呈據黎
平府申報中林亮寨二司率家丁擒獲六冲寨賊首周良
原係賞格有名苗頭又獲張弩等寨苗周保尚保生并妻
龍氏陸蘇保陸付良并妻潘氏陸蘇喬烏仔并妻龍氏潘
和保并妻吳氏楊劉生崖村寨民吳廷章等擒獲賞格有

名苗頭吳國佐親弟吳元保吳三保并顯同妻吳氏子吳樓又林大章等擒苗婦妹索妹娘共二十名口斬獲都莫寨苗老索董隨首級二顆潭溪司捕獲都莫寨苗吳南江苗女吳南文又斬首級二顆到府俱轉解辰沅道外又據赤溪司申報贄畫黃龍把總盛蠡印同本司土官吳皇楊鼎督率鄉兵於巴野後路把截斬獲首級二顆并獲槍弩腰刀等件又據印水司土官楊光輝申報領兵前去九簡五簡地方堵截斬獲首級二顆又據亮寨司長官龍祖華報稱帶兵於太平山斬獲苗級四顆防守永從縣把總向承傳帶兵於後山親斬首級一顆等因又准總兵官李應

祥移報相同又據副使袁應文呈據都勻府署印推官楊應第申奉院道紙牌遵依督千戶楊希堯撫苗把總屠登瀛李夢麒等招撫崖埋谷干與江外天壩一帶共九十七寨苗民歸降服府管束認納原額糧差情願建立廣化營於彼駐兵等情又據指揮桂本枝土舍蒙試張國興等報皮林諸苗被官兵殺敗奔潰各官舍督兵把守者牙等處一苗不得渡江奔逸等因又據經理播地副使尤錫類叅議張文奇呈據經理貴陽府知府劉冠南申准委官本府添註通判夏勳標下中軍官劉岳移奉撫按兩院紙牌遵依會同原任桐城縣知縣鄭國材原任武驤衛經歷曾學

孔標下旗牌官馬武卿思州府生員何鯨督率孰知夷情把總何楊保楊正朝李應元羅應禎沈仕達許希賢蒲月清等前往九股瓮谷龍等寨審勘諸苗情形順逆有無協助皮林據台徒等寨苗頭謝保仰計牙風等領苗千餘於瓮谷龍地方扶老攜幼稽首懽呼爭相納土願聽設流將戶口糧馬造冊呈遞職等受之共計大小七十四寨人戶二千四百六十六戶苗民男婦九千五百一十三名口遞年認納秋糧二百七十八石六斗馬館銀一百一十六兩二錢三分隨詣崖門地方據九股各寨苗民曹全真龍歐亮等吐稱上下九股苗寨蔓延三省其江內下九股通五

開衛皮林等寨原與湖廣接近聽彼就近降附外今合盤等寨上下六營共計七十二寨界在江外爲上九股苗夷附近貴州今願就近歸降改流乞准收撫免剿將戶口糧馬文冊呈遞職等又受之共計七十二寨人戶二千四百四戶男婦七千二百四十七名口遞年認納上田秋糧二十三石六斗三升八合每石折銀伍兩共折銀一百一十八兩一錢九分又馬館銀八十七兩三錢九分糧馬二項共銀二百零伍兩伍錢八分俱以萬曆三十年爲始起徵該職等看得各苗盤踞巖谷週聯三省瓮谷龍等苗舊隸黔蜀二省諸土司分轄雖云桀驁不常其受羈縻而稍稍

輸糧馬者猶有十之二三至九股則地既深廣種類浩繁披甲荷戈人面獸心蓋自土司劉玉海被戮以來歷伍十載不通王化無論荼毒生靈甚且助播煽虐莫可誰何真地方一大隱憂也近楚有事皮林正黔協力堵截之日而此苗與皮林壤地聯絡勢相倚輔儻不先謀攜解令諸苗居中陰合楚師從外擊則皮林援諸苗爲內應而且得匿其逃竄黔師從內截則諸苗助皮林爲外戶而又將邀我歸路首尾牽制進退衝決蓋亦危矣幸蒙院道先事定謀指授方略令職等臨果撫勘各苗遂畏威懷德俛首乞降不煩片甲獻土投降自是西南漸底廓清而地方可幸

息肩矣所有取具苗寨戶口疆土糧馬文冊及苗頭姓名合行連人解詳定奪等因申詳前來該二道會看得九股瓮谷龍各寨諸苗種類繁滋盤踞窟穴者百十餘寨負固王化者伍十餘年向倚播酋聲勢已蓄兔狐之憤今助皮林羽翼益堅唇齒之盟我黔師欲圖竝舉則應援牽制之爲難欲先一隅則竄伏邀截之可慮故必伐謀以孤其黨方得專力以搗其堅所據委官通判夏燭等宣揚朝廷威德先旣外撫滾水等寨鼓之風聲旋即深入九股奧區落其膽魄自茲皮林天甫諸苗遂絕望於三窟我師長驅夾剿行收功於一舉除招撫有功各官分別敘賚等因呈

詳到臣據此案照先准兵部咨該本部題覆臣題爲剿苗
有期進師宜慎謹陳未議以圖萬全事又該巡按貴州監
察御史宋興祖題爲苗患方熾勢權未一懇乞 聖明速
賜裁決以早安邊宇事等因題奉 聖旨兵部知道欽此
爲照皮林惡苗戕殺官兵攻劫縣治其極惡窮兇之狀黔
楚撫按形之疏揭者不啻詳矣近該本部查據偏沅湖廣
撫按疏揭議令撫臣江鐸坐鎮沅州督同征播鎮道將領
一意剿滅此醜而湖廣川貴廣西各省督撫查照題議事
理移駐鄰近地方撥兵處餉協同進攻或遏其旁奔或阻
其後逸仍申嚴大小將領等官各釋成心共襄 國事如

有挾忿睚眦秦越相視者聽總督撫按廉實稽名從重叅
究等因題奉 聖旨是這惡苗未靖著江鐸陳璘遵照前
旨相機進剿各督撫著移駐鄰近地方處置兵餉協同攻
擊未許參差誤事欽此欽遵又准川湖貴總督右都御史
兼兵部右侍郎李化龍咨同前事等因備咨到臣臣與按
臣宋興祖多方計議就經備行新鎮都清守巡二道調集
漢土官兵轉運糧餉先發募兵五百付遊擊董獻策黎平
府知府熊廷相未從縣知縣李宗周督率標下把總梁鳳
吟五開衛千戶陳治邦統領協同衛軍鄉兵共守黎平城
池以固根本又行都清道副使袁應文行令指揮桂本枝

土舍蒙試張國興督兵二千名於都勻府爛土七圍地方
逼近皮林去處分兵把截又委把總屠登瀛李夢麒等招
撫崖埋峇干與江外天壩一帶屯守以防奔逸又行副使
尤錫類知府劉冠南催令通判夏燭中軍劉岳等帶兵五
百名深入九股受降待以不死以翦其羽翼又慮黔中歲
侵米貴民不聊生行令叅議張文奇知府張叔爾等多方
買米以爲軍興猶恐不足又行令湖廣右布政使梁雲龍
叅議薛士彥運辰常漕糧剩米接濟又借米於偏沅撫臣
蒙慨發鎮遠米一萬四千餘石就近發運以便轉輸臣於
三月二十五日移駐鎮遠會同總兵官李應祥分布將領

陳寅徐成等於二月初八日出師由珂水天柱五開進發
以爲楚師犄角以防惡苗奔突今據前因臣除批行紀功
道查驗功級給賞候按臣履覈行經理道將九股內附諸
苗寨隸於黃平著實撫恤外該臣會同總督川湖貴州軍
務兼理糧餉巡撫四川地方都察院右都御史兼兵部右
侍郎李化龍巡撫偏沅等處地方提督軍務兼理糧餉都
察院右僉都御史江鐸看得皮林諸苗頃乘播亂戕殺多
官罪惡已劇誠天討所不赦者顧自楚鋤之路近而頗
夷自黔伐之路遠而更險荷蒙皇上責成偏沅撫臣而
令黔兵協剿臣受命以來移營鎮遠守黔要害但黔中

一線之逕四顧皆苗九股谷龍一百四十餘寨崖埋峇干
九十七寨東與皮林通則其右翼梁上巴野鬼懷石弄三
十餘寨北與皮林通則其左股臣與總兵官李應祥監軍
道袁應文紀功道張文奇副總兵陳寅從長計議不撫九
股崖埋等寨則我師一出彼從中起腹背受敵此立敗也
不撫梁上諸寨則我師欲進彼從外阻道路爲梗亦坐困
也況黔中彈丸之地連年用兵平播之後荆棘叢生臣宣
布皇上恩威諭以撫剿並施九股地亘三省從來不庭
谷龍夙稱崛強梁土久阻聲教崖埋向號獷戾茲者不費
一鏃而土地戶口奉籍而輸者矣天日而血盟不戮一

夫而椎髻侏離牽袂而來者睹帷幄而股栗計寨二百四
十有奇人戶四千八百七十有奇男婦一萬六千七百六
十餘名口秋糧三百餘石馬銀二百餘兩臣以爲諸苗旣
服可無內顧矣無何巴野鬼懷諸寨二百年來不服王
化白晝劫人赤囊殺吏虜人妻子掘人墳墓種種積暴亡
異皮林近復爲皮林逋逃聲勢相倚黔師出天柱銅鼓必
由其地乃桀驁如故馮險拒敵臣不得已令諸將鵬剿之
以通道路之梗以伐叛逆之黨仰仗 皇上威靈 密勿
石畫樞筦機宜省闈指授以故兵交刃接星流彗掃數日
之間斬獲多級翦闢草萊夷爲孔道外得以會楚粵之師

內得以收安輯之功皆此戰矣是役也翦皮林之羽翼令
五溪之蠻不蔓延於鄰封籍九股之版圖俾一綫之路遂
式廓於土宇文武各官之功亦自有不可氓者如總兵官
都督同知李應祥天授勝筭神輸祕圖草木爲兵宛乎金
城方略椒蘭比德依然大樹將軍犄角秦人之鹿首尾常
山之蛇功當首敘以膺 異數監軍道副使袁應文潛運
宏略獨決神機分布於都雲天柱之間深入其阻指搗於
巴野石弄之穴克成厥功功宜首論特行優敘督餉道右
叅議張文奇當庚癸之呼勤水陸之運艦銜舳接而澹爲
安流輻輳輪輸而士騰宿飽經理驛傳道副使尤錫類舞

格苗之羽築降夷之城始撫谷龍析拒螳之怒臂繼臣九
股權困獸之鬪心此二臣者運餉招降俱極苦心功應並
論均當優敘副總兵陳寅提劔風驅棧旗電掃巖居穴處
之壘遽復於隍木衣卉服之酋盡褫其魄都司徐成雅似
書生蔚然虎將破夜郎已如衝鷲之埽落葉馘叩苗直是
烈火以燔秋蓬署守備童龍魁岸邁筆夷旗豎而氛埽梁
上英風肅部伍劔鳴而鷹揚銅鼓此三臣者披堅執銳身
在行間戰功並茂應從優敘清浪叅將劉效節飭兵戎貌
貅生色撫苗夷洞寨傾心累戰能立膚功一肯未虧素望
標下遊擊都司張秉忠循循緩帶臨敵壘而勇著先登烈

烈枕戈守中堅而師稱以律標下中軍劉岳却敵則桓桓壯略刁斗夜嚴撫苗則翼翼小心衣襦日戒守備汪如淵同士甘苦人懷挾纊之恩料敵險夷戰成破竹之勢此四臣者相應竝賚而劉岳深入不毛以撫諸苗應從優賚者也經理黃平貴陽府知府劉冠南以理煩治劇之才行拯溺棟焚之政五司卽頑梗恃若青天九股極獷信化爲赤子鎮遠府知府張叔璽經濟足紹家聲練達允爲國器簡髮數米而萬口歡騰水運陸輸而八面應敵黎平府知府今以同知聽調熊廷相持空峯以當虎口坐孤城而捍赤眉其苦劇於臥薪嘗膽而不驚其功成於投戈委弓而

益遜此三臣者備嘗艱辛均當優賚內熊廷相又逼於賊貼危而安或令復職以圖善後者也貴陽府同知徐庭綬籌筭輸貴陽之金馳驅入鎮遠之帑士腹不朽戎儲益饒貴陽府添註通判夏勳往來虎穴崎嶇羊腸覽三苗萬死之誅弘九股再生之路都勻府推官楊應筮不署事雲中撫苗域外崖埋得復舊業者牙竟爲良民施毛水縣知縣袁尚紀挈兩印拮据煩劇之場運萬鍾焦愁溪洞之險清平縣知縣劉啓周驚烽走傳而履變不駭飛芻輓粟而走險如夷婺川縣知縣葛楚元住邛水而與虎豹爲鄰辨首功而懸鏡衡不爽印江縣知縣張鎔旌旗觸天而討賊益厲舳

艦沸水而催運如期永從縣知縣李宗思以世胄之子而當賊壘竭死守之力而完郡城以上諸臣均應竝賚內通判夏燭不以左遷二心不以入夷銷魂忠貞沈毅當破格以酬其勞者也原任守備伍萬鍾率酋豪而捍疆場化兵弩而持鉤鉏原任守備史良將紆籌自有甲兵校士皆成組練標下贊畫官黃龔仁且有勇常杼倚鹿之謀儒而能將力贊羹臬之計鎮撫葉定遠本武闥入彀之奇奮虎帳吞胡之勇贊畫官李師沆年少而考能搏虎力勁而劍可刳鯨獨山州土同知蒙詔討夜郎不辭馬革征皮林復指臬巢以上諸武臣均當竝賚內贊畫官黃龔逢大敵不怯

見小利不取似當優處以儲將材者也原任桐城縣知縣今閑住鄭國材首建議以服苗夷遂因壘而降崇國思州府學生生員土舍何鯤見一面而知商網率九股以歸漢庭原任衛經歷曾學孔餐風宿水遍歷障徼標下旗牌官馬武卿衝泥冒瘴交盟犬豕指揮李棟材治兵振旅控扼要害指揮張義把總黃如龍羅應禎何楊保楊正朝李應元沈仕達許希賢蒲月清王宗舜等俱以鄉導而效勤劬均應竝賚內知縣鄭國材以鄉官而歷險生員何鯤以土舍而傾誠在鄭國材當從優獎進階在何鯤應授一土巡檢以化誨諸夷輸納糧差者也標下練兵把總王嘉言丘

富郎梁鳳吟贊畫蔣玉成劉漢徐一夔張爾知劉恩指揮
桂本枝千百戶梁秀魯思孔劉于爵張鳳起顧紹元王民
皞陳治邦傅良臣楊希堯應襲張克震把總周明易之謙
陳正邦李占先吳文秀陳定華統鄭國明侯仕芳盛鏞印
楊綸王世卿楊應詔任承忠譚春安世珍夏尚彬楊光岳
江萬程葉茂胡來聘楊國欽陳猷向承倬吳應龍李茂徐
大綬丘維屏徐繼冲屠登瀛李夢麒金聲孫應麒陳英督
陣官馮邦濟劉英汪瀾向承宗熊諫總旗王嘉倫武生王
治安張國揚葉占先上舍蒙試張國興土官吳臯楊鼎楊
光輝龍祖華或馳戈矛而破敵或謹亭障以守禦均應並

賚以旌其戰伐者也鎮遠府土同知何守德土推官楊通
淮經歷包一鳴陳江定劉汝安饒崇奎陳九齡吏目萬一
實典史楊啟指揮何天寵陳尚策魯重禮孫欽千百戶李春
元百戶蕭鳳鳴鎮撫張國壯俱運糧鎮浪而持籌於倉庾
吏目張大紀千百戶李朝陽吳秉鉞百戶魏國忠朱萬春湯
承禹胡朝賢把總王安民劉崑白其心蔣文堂宋真相俱
運米辰常而凌狎於波濤俱應優賚以酬其辛勞者也若
黔中米貴如珠民多菜色千里餽糧勢難宿飽臣乞糴於
楚荷偏沉撫臣發楚中盈倉之時活黔中涸轍之魚慨然
濟臣米一萬四千餘石臣甚德之卽解銀六千兩以助楚

餉第同事憲臣例不敢敘當其持湖廣右布政使梁雲龍
右叅議薛士彥奉偏沅撫臣檄先後催運在梁雲龍自行
間而轉輸輦車驪駕不以秦越而殊在薛士彥自省城而
杼籌兩檝雪帆不以風濤而阻辰溪縣知縣張守緒躬至
黔境而跋涉爲勞親放楚米而顆粒皆惠淑浦縣知縣梅
友竹召募運舟而齎送有緒編發船戶而燥濕無虞永順
司經歷唐元永州衛指揮張國皆同舟共事相與濟黔饑
者古人重一飯之義臣惡敢忘之也除搗皮林之巢擊矣
甫之頸係楚師楚功臣不敢越俎聽偏沅撫臣另題外
臣謹將黔中斬獲功級據實奏報并進九股等寨內

附戶口冊籍上塵御覽伏乞勅下戶兵二部候楚
輿疏至總爲覆議分別上請凡支用錢糧辨驗功級行
巡按御史覆覈降苗戶口應附黃平行該道及新設府州
措置經理施行謹題請旨

調補各道以便經理疏

題爲方面多缺懇乞更調速補以便經理事據貴州布政
使司呈准本司分守貴靈道左叅議梅國樓咨稱本職原
籍湖廣黃州府麻城縣人萬曆貳拾玖年正月拾陸日巡
歷永寧衛有家丁梅春報稱父梅汝觀於貳拾捌年拾壹
月貳拾捌日在家病故本職到應回籍守制等因准此轉

報到臣據此該臣會同巡按貴州監察御史宋興祖查得該道統轄地方西連播境東制諸夷逆酋蕩平地方新定正在用人料理彈壓今左叅議梅國樓丁憂回籍近接邸報又復被察聽降所有員缺相應具題速補案照臣先為就近選用等事且題行驛傳道副使尤錫類貴陽府知府劉冠南經理黃平一帶地方據稱黃平地狹戶不滿叁百城不過貳里斗大之域不堪建府若加壹道壹叅尤不能堪等情到臣臣以皮林事移營鎮遠因檄經理道府州縣各官同至鎮遠會議該臣看得黃平褊小不堪建壹州以壹叅將坐鎮其中將新府移置平越卽屬新鎮道轄

轄不必另設該道衙門其經理驛傳副使尤錫類相應加銜調新鎮道新鎮道叅議張文奇應調貴道補叅議梅國樓缺遺下驛傳道副使員缺相應速補伏乞勅下吏部再加查覈更調銓補庶黃平壹路得省壹道之設而新鎮貴志無驛傳之患矣謹題請旨

請監軍楊按察使 卹典疏

具由 卹典疏

題為監軍征播積勞身殞懇乞 聖明破格甄錄以卹死事以勸勞臣事據布按二司署印副使洪澄源都清道副使袁應文分守新鎮道右叅議張文奇呈奉臣紙牌據江西泰和縣申據原任貴州監軍按察使楊寅秋弟寅冬子

嘉禎等呈稱父因征播勞苦成病題 允回籍調理不愈
於萬曆二十九年三月十八日病故乞賜轉達等情理合
申報據此備牌仰司會同按察司及守巡等道備查監軍
楊按察使歿於 王事與東征監軍陳御史四川監軍張
叅政事例有無相符作速會議明白具由通詳以憑具
題施行等因奉此行據貴陽府知府劉冠南會同同知徐
庭綬申稱查得已故監軍楊按察使志在滅賊身唯許
國兼程投貴筑籌畫心勞穿暑入海龍腥膻氣染致成篤
疾遽爾相生查與東征陳御史四川張叅政事例既同相
應比例上 請乞 恩贈廕等因又該都清新鎮二道會

看得楊按察使經始剿播既食少事煩深入播巢復殄瘡
歛血是以播事甫夷而遽乞骸骨詎意播功方敘而旋聞
訃音 恩典未沐於躬膺忠魂宜慰於泉壤近征東陳御
史四川張叅政查 明例既與相符 卹典委宜從厚等
因到司該本司會同按察司看得已故監軍按察使楊寅
秋忠貞體 國慷慨忘身拜 命當中外惶惑之時單車
就道入貴屬兵食告訕之會畢慮經營武備振脩狙詐作
使旣拔重關之險直禱危困之虛沐雨櫛風與士同苦援
桴冒矢有死無生一戰斯得非人積勞頓成痼疾引歸未
幾訃報旋聞據前後決策運籌無忝以勞定國之列而終

始鞠躬盡瘁尤徵以死勤事之忠况前者定交趾平府江
勳在西粵爛焉其生也褒顯未膺其死也卹典宜厚查
得往歲監軍御史陳效歿於朝鮮該總督尚書邢玠具
題該吏兵二部覆奉欽依追贈光祿寺少卿廕一子錦
衣衛世襲百戶仍與立廟祀之近四川監軍叅政張棟播
事告成卒於渝水該川湖貴總督部院李化龍業經此例
題請今按察使楊寅秋死事既同明例正合相應請
乞具題照品贈廕仍廟祀以慰忠魂等因到臣該臣會
同巡按貴州監察御史宋興祖看得人臣之於國死事
易成事難非夫死之日勿也徒死而償事則成事者難也若

既成事而又死事則死亦難之難也明主知其然故以
死勤事則祀之憐其死也不問其事之成否也以勞定國
則祀之酬其勞也不問其身之死否也若逢世難有定國
之勞及功成兼死事之苦有臣若此明主所以憐而錄
之者又不知其當何如矣今貴州監軍按察使楊寅秋不
幸類是當播賊方狂貴州只尺虎穴獨櫻其剡臣以不才
謬當是任文臣錯落晨星武將逡縮首鼠臣隻手獨拍爰
爰乎殆矣寅秋捌月陸辭十一月入黔賊方犯東坡邀
之興隆幾爲所困乃單騎之貴陽與臣調募漢兵操縱土
夷卽軍興戎器各有攸司寅秋既督兵又理餉既治軍又

繕械書坐臣署手不停書夜叩臣門舌不停議而後東坡之賊始退既首拔烏江河渡二關賊突出犯其勢甚銳寅秋直以身當之作使隴澄安疆臣批亢擣虛以解其紛聞路攻堅以扼其喉峭壁無水則雜血以飲積尸如山則析骸而臥而後海龍之功始奏歸來飲至容色黎黑不能卽席次尋聞母病飲食頓減不能下牀第臣見其病勢急卽爲具題伏蒙皇上俯從部覆憐允回籍調理病痊起用寅秋得旨以十月南還旣入里門病日綿延臣屢遣人問之卽從褥上輒以手書來不曰皮林未了之局作何收結則曰播州新救之邦未易控制無一語訴其病無

一字及其私臣猶冀其膚功甫奏寸祿未霑或可苟延

歲時以膺皇上異數不謂三月竟長逝矣計來貴州軍

士哭於部伍土夷哭於邊徼僚案官吏哭於庭兒童走卒

哭於市臣以總角共研席白首同干戈一生一死惡得不

拊膺長涕臣又查得寅秋叅政南寧日黎莫交惡羽檄日

馳議者謂當閉關以待其自定寅秋至曲爲經略乃受黎

之降不斬莫之祀無煩一鏃九真受吏臣竊以爲毛尚書

伯溫之撫登庸不加於此矣已而府江徭賊弄兵林坳寅

秋與粵西諸臣同心拮据斬獲數千比者宣捷告廟臣

又以爲翁尚書萬達之定左江不烈於此矣寅秋在廣廣

重在貴貴重故廣西按臣黃紀賢徐宗濬常語人曰此真
邊材川湖貴總督李化龍貴州按臣朱興祖常語人曰此
真監軍有臣若此 國家不能盡得其用而俾之殮瘞觸
霧以死故臣之痛哭不獨爲寅秋不獨爲貴州已也寅秋
有母業已逾采望樹垂白在堂寅秋有子女然而未嫁未
婚者嗷嗷在孺此雖寅秋之私然今日所望以哀而存之
者 皇上也古人惟蓋不棄爲埋狗馬貓虎必迎爲食鼠
豕寅秋綏交征徭平夜郎三役彼存日尚不敢言功而况
身後獨計以爲鼠豕之食犬馬之力 國家爲將來死事
者勸自有 藁與不忍處其薄耳照得已故監軍按察使

楊寅秋世篤忠貞才兼文武枕戈以討賊則九死爲輕介
石而歸田卽終日不俟方焚老上之塞遽隕營中之星志
決身殲籌 國何減於諸葛功成勇退承家不忝於文貞
况交南折箠之勳方之銅柱而府江破竹之烈過於金城
合三省之其勤以死以勞戰功爲最睹四夷之來享于理
于疆 卹典宜優頌者陳御史殉於朝鮮近者張參政卒
於渝水死事旣同 明例昭然又經司道查議非濫一應
贈官廕子立祠各項相應比例上 請伏乞 勅下吏兵
二部覆議明白查給施行庶幾幽以瞑勞臣之目明以鼓
戰士之氣臣不勝懇乞 命之至謹題請 旨

恭報災異疏

題爲天旱地震非常災異事據貴州布政使司呈准帶管糧儲安平道副使袁應文帶管貴寧道副使洪澄源咨據貴陽府署印同知徐庭綬申據定番州申稱本州於萬曆貳拾玖年陸月拾捌日酉時忽然東南有聲滿城地震至戌末連震貳次聲如雷吼軒如伐鼓山岳震動房屋欹斜人民皇懼變出異常又州屬各土司自春入夏不雨至伍月拾陸日稍得微雨栽秧自後復旱山田龜坼野無青草祈禱無應餓殍載道加以地震民心益搖又據貴陽府貴前二衛及安順鎮寧永寧普安等州威清平壩普定安莊

安南普安等衛申稱各地方自去冬拾月至於今夏雨澤愆期赤地千里菽麥秧種盡枯溪澗源泉俱涸至伍月內方得微雨頃緣久旱不能成水遂令田疇盡行荒蕪斗米直至肆錢軍民往往逃散等因又准貴寧道咨據烏撒畢節赤水等衛申稱各地方自正月不雨至於伍月溪水斷流瘠田成墟斗米騰踊至肆伍錢少壯逃移四方老穉枕籍而死方東作時無種可布間有一二種者久旱之後復遭水雹饑民相聚痛哭至不忍聞又准帶管新鎮思石道副使尤錫類都清道副使袁應文咨據都勻鎮遠銅仁石阡等府龍里新添平越清平興隆黃平等衛所及經理播

地知府劉冠南申稱貴州昔稱無三日晴不謂今春至夏連旬浹月烈日方赫霖雨不施迄今陸月終矣秧苗未插卽有挿者化爲烏有米貴如珠民不聊生至於黃平伍司地方舊民甫歸新民未集本以荒蕪之區加之旱魃之災方出於水復投之火錢糧無措勞來爲艱又據思南府申稱本府地方連遭霍雨麥菽沓爛所屬婺川縣於本年三月二十六日夜自二更時分大雨如注水雹暴風一時并作雷聲震地至伍更始歇該縣原無大江四面溝渠突發野水自北門破城而入城內水深數丈滄倒思石道公署儒學衙舍宮牆舉人牌坊縣堂六房公解居民房屋數百

餘間溺死縣民李崇德王東珊王甫黃廣西王佐陳應魁陳應祥等家男婦二十餘命家財牲畜不計其數至二十七口已時稍退闔縣號泣慘不可言各咨報到司該本司署印按察司副使洪澄源看得貴州僻處邊隅古稱荒服去歲夜郎匪茹旣加以以師旅今歲女魃爲祟又因之以饑饉一春不雨布種無方伍月微霖米價頓增麥菽絕市軍民縣釜不惟賦稅無辦抑且死亡相繼恐播州之遺黨合八番之流民將來之禍有不可言者所據前項地方報到災異水旱情由合行通詳等因到臣該臣會同巡按貴州監察御史宋興祖看得貴州山多田少賦薄民貧通省

官軍俸糧率皆仰給川湖即使雨暘時若年穀豐登土力本堵收穫原寡閭閻小民猶不免于窮蹙况值剽播之日荷戈轉餉攀崖緣木業已疲于奔命播平之後甫脫兵燹復罹歲惡又展轉於溝壑天屯其膏東作旣艱種未下土西成何望米價驟騰一斗四錢饑民相聚千百爲羣人心洶洶莫必其命臣等躬率僚屬齋宿步禱雖獲微雨顧又涸之土非杯水所能濡目今赤日如燬民饑如故道殣相望以待哺野殍相牽而赴死乃安川縣洪水破城又以水災聞定番州苦旱失耕又以地長山臣等去年苦兵今年苦饑黔東憂旱黔南憂水左支右吾一呼三顛計無復之

矣况夜郎反側之子未就韁束益以今年流離之民轉相驚譟他日之患誠有如司道所慮者未可測也臣等又考之傳曰天地之氣陽伏而不能出陰迫而不能升於是乎地震是陽失其所而填陰也則地之震非無故也又曰百姓苦士卒煩碎暴師外營故天應以無澤則天之旱亦非無故也臣等當賊平後不能順適陰陽撫恤軍民以致天乾地動災異頻仍失職之罪無容遁於斧鉞矣竊計昔年報災民心望澤非議賑則議蠲近蒙陛下軫念邊陲俞戶部請動支餉銀一萬兩賑恤全黔臣等恭將明命分布八番黃童白叟扶攜聽賑懽呼動地皇恩亦旣渥

矣然而發棠非分之邀恐不可再如欲請蠲則貴州秋糧其數幾何卽以贍軍猶不足十之一二而一槩蠲之第恐明年脫巾之變又復可虞臣等友復思惟查得湖廣長衡郴等府州縣自萬曆十四年起至二十八年止共拖欠協濟貴州糧銀七萬八千三百九十餘兩四川烏撒烏蒙東川鎮雄四土府自萬曆十七年起至二十八年止共拖欠貴州本色糧米一十二萬六千一百六十餘石糧銀三萬六千九百一十餘兩黔被兵而湖南川南不被兵黔民饑而湖南川南猶未饑以有餘濟不足亦鄰國相採之常而況今所責於二地者皆黔所應得之金也伏乞皇上

垂憐夷方大兵之後繼以大侵軍民重困如坐阱穽勅下戶禮二部再加查議覆請咨行川湖貴督撫衙門嚴責守巡印糧官員將拖欠貴州糧銀如數催徵速解聽臣等賑給卽以年遠者不能全解其年近者得其半亦足少杼目前倒懸之急庶幾公帑不必發民賦不必蠲邊圍饑氓得蒙更生之慶而殘播遺孽無復跳梁之虞矣謹題請旨

銷等漕糧并乞餘米賑饑疏

題爲苗賊已平謹將支解漕米銀數據實奏報并乞餘米以賑黔饑事案照萬曆二十九年三月十八日准戶部

卷之七
三
咨該臣題稱湖廣漕米貴州原分八萬九千二百三十石
二斗五升八勺止實運到九千五十三石六斗八升七合
二勺尚剩米八萬一百七十六石五斗六升三合六勺於
辰常二府未解該本部看得用剩漕米不無日久滯損合
咨前去轉行辰常二府將見貯漕米作速變價差官解部
以抵軍需等因備咨到臣就經牌行湖廣布政使司并督
糧道右叅議薛士彥查算變價起解去後隨據該司道冊
報湖廣應該分解貴州漕糧本色正耗米八萬九千二百
三十石二斗五升八勺各衛餉米載船一年有餘滯爛折
耗數多委官查過折耗及水脚共六千三百七十三石六

斗三升九合四勺實該分運貴州米八萬二千八百五十
六石六斗一升一合四勺二十八年内爲征播事貴州委
官知縣陳廷範等起運連脚耗米九千六百零八石一斗
五升五合九勺二十九年内爲協剿皮林事貴州委官蔣
文堂等運過辰州府貯米五千石偏沅巡撫江都御史牌
行常德府支米八千二百一十八石八斗給湖廣永順司
兵作糧米辰常二府支過般運脚米三百四十二石九斗
三升常德府見貯米四千四百五十石二斗收候聽文支
運實存湖廣米五萬二千九百零五石五斗二升五合五
勺照依漕例每石變價銀三錢六分五釐辰州府米二千

二百三十一石照依時值每石變價銀三錢五分通共變價銀二萬一百二十六兩三錢六分六釐等因冊報到臣俱經牌行該司道將前項變賣漕米價銀徑自差官起解赴部交納外該臣查得貴州應分漕米實該八萬二千八百五十六石六斗一升一合四勺除貴州去年征播用過九千六百零八石一斗五升五合九勺今年協剿皮林用過五千石偏沅撫臣批發永順兵糧八千二百一十八石八斗辰常二府支過般運脚米三百四十二石九斗三升外止常德府見貯米四千四百五十石二斗應當變價解部但黔中此時災異頻仍天旱於上溪無渚水地震於下

土無生稼斗米四錢軍民游饑官欲發棠而無米可發民欲乞糴而無糴可乞其流離死亡之狀二百年來所未有者臣另有疏具奏其常德剩米俯容臣差官起運至黔賑饑原未運米五萬五千一百三十六石五斗二升五合五勺該變價銀二萬一百二十六兩三錢六分六釐已行湖廣司道起解戶部相應具題伏乞勅下戶部咨行湖廣巡撫衙門轉行湖廣布政使司及督糧道將前項米價銀起解交納其常德府剩米聽臣起運至貴州賑荒完日咨報戶部查考施行謹題請旨

考覈給由縣官疏

題爲遵例考覈給由有司官員事據貴州布政使司呈行
准貴州按察司并守巡新鎮二道咨牒及據鎮遠府申稱
考覈過施秉縣三年考滿給由知縣袁尚紀詞語并重覆
結查得本官任內竝無公私過名增減歷俸月日其保民
實政五事弔取先經道府覈實并蒙撫按閱查過文簿對
查俱已脩舉果無虛冒無礙緣由結報到司據此案照先
奉巡撫貴州郭都御史批據鎮遠府申據施秉縣申准知
縣袁尚紀關稱本職見年叁拾歲四川龍安府江油縣人
由選貢萬曆十九年九月二十五日除授陝西興安州儒
學訓導二十五年九月內陞鎮遠縣知縣二十六年二月

二十六日到任二十七年十二月內聞報更調施秉縣知
縣二十八年二月十二日到任扣至二十九年正月二十
五日止連閏實歷俸二十六箇月三年考滿任內蒙巡撫
貴州郭都御史巡按貴州監察宋御史會題疏開本官
才局精明議論妥當此健令也而處之附郭郡城未足以
展遊刃之才移鎮遠於施秉藉之防禦俾苗將益弘其壯
猷又蒙巡撫貴州郭都御史敘錄征播功次疏開本官三
楚甘泛舟之役萬竈均投醪之恩相應紀錄擢用又蒙本
院敘錄協剿皮林功次疏開本官挈兩印拮据煩劇之場
運萬鍾焦愁溪洞之險薦調一次列薦二次例應給由關

縣申府轉詳奉批仰布政司查報奉此又蒙巡按貴州監察宋御史批布政司查報蒙此就經備行各該司道考覈結勘無礙又該本司結查得本官父母妻並無貪酷再醮例應請封呈乞考覈具奏等因呈詳及具造五事總數書揭到臣該臣會同巡按貴州監察御史宋興祖考覈得施秉縣知縣袁尚紀文學既長吏才儘裕轉輸三楚而庚癸不呼經理五司而鴻鴈攸集稱職既經各司道查結無礙又奉有府州縣正官雲貴兩省免其赴部之例除行令本官在任接俸經理新縣管事文冊差人齎繳并將覈過脩舉實政五事書揭咨報都察院查考外相應題請

伏乞勅下吏部再加查覈本官曾經臣等薦調一次列薦二次父母妻各無貪酷再醮近例應得恩典併乞查酌施行謹題請旨

奏報協剿皮林招降九股支用餉銀疏

題為協剿皮林苗賊已平謹將支用餉銀造冊奏報事
萬曆二十九年八月十三日行據帶管督糧道貴州按察司副使洪澄源造報覈查過貴陽鎮遠二府支銷協剿皮林招降九股用過糧餉賞功各項文冊到臣據此案照朱准戶部咨為逆寇既平大兵已撤等事該本部題稱貴州征播剩餉五十一萬六千六百三十二兩二錢一分三釐

七毫五絲合無於內支取三十萬兩委官作速解京湊發
邊餉施行等因題奉 聖旨是欽此欽遵備咨到臣該臣
看得貴州原借四川銀十萬兩當戶部未題取三十萬時
四川已咨討回十萬今除還川餉十萬兩實應該解還部
餉二十萬業已陸續差官張秉忠馬武卿王安民等解十
五萬止有五萬見今起解已經咨報戶部訖又准兵部咨
該本部題覆臣 題爲剿苗有期進師宜慎謹陳末議以
圖萬全事又該巡按貴州監察御史宋興祖題爲苗患方
熾勢權未一懇乞 聖明速賜裁決以早安邊宇事等因
題奉 聖旨兵部知道欽此爲照皮林惡苗戕殺官兵攻

劫縣治其極惡窮兇之狀黔楚撫按形之疏揭者不啻詳
矣近該本部查據偏沅湖廣撫按疏揭議令撫臣江鐸坐
鎮沅州督同征播鎮道將領一意剿滅此醜而湖廣川貴
廣西各省督撫查照題議事理移駐鄰近地方撥兵處餉
協同進攻或遏其旁奔或阻其後逸仍申嚴大小將領等
官各釋成心共襄 國事如有挾忿睚眦秦越相視者聽
督撫按廉實指名從重叅究等因題奉 聖旨是這惡苗
未靖著江鐸陳璘遵照前旨相機進剿各督撫著移駐鄰
近地方處置兵餉協同攻擊不許參差誤事欽此欽遵等
因備咨到臣就經備行都清道副使袁應文監軍新鎮道

右叅議張文奇紀功督餉調集漢土官兵轉運糧餉臣於
本年正月二十五日移駐鎮遠會同總兵官李應祥分布
將領於二月初八日出師協剿至本年三月二十八日賊
平凱旋據副使袁應文叅議張文奇呈准總兵官李應祥
手本據副總兵陳寅揭報都司徐成坐營中軍劉岳汪如
淵守備童龍等官兵陸續斬獲功級四百六十六顆并奪
獲刀槍器械等項又據副使尤錫類知府劉冠南等招降
九股等七十二寨人戶二千四百四戶苗民男婦七千二
百四十七名口招降瓮谷龍等七十四寨人戶二千四百
六十六戶苗民男婦九千五百一十三名口遞年認納秋

糧不助皮林叛苗爲惡各由到臣已經具題外臣卽牌
行叅議張文奇弔取鎮遠貴陽二府收支兵餉卷案簿冊
內開鎮遠府用過餉銀三萬二千六百五十二兩五錢八
分二釐三毫貴陽府用過餉銀五千五百五十七兩七錢
四分共用過銀三萬八千二百一十兩三錢二分二釐三
毫逐一清查冊報到臣又經檄行帶管督糧道副使洪澄
源重覆細加磨算總覈去後今據前因除覆覈相同外查
得貴州征播剩餉共五十一萬六千六百三十二兩二錢
一分三釐七毫五絲於內動支二十萬兩解赴戶部交納
又支十萬兩解還四川又戶部題奉欽依行臣支銀一

萬兩賑濟被賊殘害軍民今次協剿皮林招降九股軍前
支過糧餉賞功各項陸續支過三萬八千二百一十兩三
錢二分二釐三毫實剩銀一十六萬八千四百二十一兩
八錢九分一釐四毫五絲聽平越黃平等新府州縣經理
建置善後及新留官兵糧餉平播未賞功次各項支費通
候事完另冊 奏報銷筭所有協剿皮林招降九股支銷
糧餉賞功細數理合開坐造冊具 題伏乞 勅下戶兵
二部再加查覈行巡按貴州監察御史覆覈施行謹題請
旨

續獲播賊謝朝俸等 題請正法疏

題為擒獲助播首惡乞正 國法以紓衆憤以安地方事
萬曆二十九年七月二十二日行據貴州按察司呈據貴
陽府呈問得犯人謝朝俸年四十六歲係播州先在今剿
除叛酋楊應龍管下偽提調狀招朝俸居住四牌地方一
向恣橫有逆酋楊應龍先年殺妻侵害五司百姓奏勘抗
拒不出蒙川貴撫按會叅擒治朝俸與已獲在官偽提調
尚守忠各不合分投應龍為首督兵衝殺官兵比應龍不
遵 王化造意謀反朝俸與尚守忠各又不合在內撥置
應龍招集苗兵負固糧馬偽授朝俸與尚守忠統制提調
巡警江內七牌江外四牌二十七年三月內先任貴州巡

撫江都御史憤會阻兵令都司楊國柱經歷潘汝資指揮
李廷棟楊大材賈安國把總牙思忠孟稱堯莫天賜頭目
王嘉臣調兵於飛練劄營防剿比朝俸住在四牌隣近飛
練遂同尚守忠并已獲典刑何漢良等擁衆據守三百落
天邦二國本月十九日官兵進剿朝俸等佯敗計誘官兵
進入天邦國內朝俸率兵攻燒大營將楊都司李指揮潘
經歷父子虜去楊都司不跪朝俸卽立斬之并殺李指揮
潘經歷等本年六月內朝俸又同尚守忠合兵六萬圍困
綦江殺房張二遊擊拘執馬知縣焚劫倉庫縱放獄囚殺
傷軍民無數蒙川貴兩院題 請會剿本年十月內蒙川

湖貴李總督特疏題 請頒行賞格內開一應龍手下提
調巡警尚守忠謝朝俸等及其餘但係領兵議事之人若
有能率衆來歸或攜家歸附者以前罪惡盡除不問原有
官者仍以原職守土原無官者授以指揮千百戶職銜令
立功自效若能擒斬應龍者照格陞賞一應龍頭目人等
各係本省及外省人氏各有籍貫俱已查明若賞格懸示
兩月之後既不能擒斬又不肯投降直至拒敵交兵爲賊
盡力其家卽係謀反之家賊平之後卽移文原籍將父兄
子姪人等盡以謀反家屬捕誅等因通行頒示比朝俸與
守忠各又不合故違賞格不出投降叛逆如故至本年十

一月內朝俸同尚守忠就率兵四萬焚燒東坡爛橋軍民男婦盡戮梗塞湖貴要路尚守忠住居湄潭專管四十八庄相近龍泉往來熟識引同朝俸帶兵伍萬於二十八年正月內攻打龍泉殺土官安民志虜吏目劉玉鑾等軍民多被損傷蒙川湖貴各院會祭調集漢土官兵於本年二月十二日出師應龍探聽大兵將至召積兵糧朝俸與尚守忠各又不合統衆分兵對敵於六月初六日官兵攻破海龍囤將逆酋妻子楊朝棟等賊黨楊兆龍等盡擒獻俘比朝俸與尚守忠乘機逃出朝俸投入蘭州地方避住尚守忠同苗逃入黑燕林箐中潛藏至本年十月十五日

有標下會武舉把總官葉定遠管下千總王國臣報稱見黑燕林中有苗潛藏箐內遇夜衝入劫捨降民乞行發兵梭捕葉定遠當卽約會千總李玉與同王國臣李文芳廖繼祖武生任天秩葉占先哨官楊軒率兵藍自紀毛關通魯仲義等於十六日至箐梭獲爲首一人係是 欽依賞格內有名首惡尚守忠就行綁解右監軍道十一月初十日轉解巡撫郭都御史巡按宋御史俱發按察司監候行府查審招報蒙府審詳間二十九年正月內蒙原任叅將今充爲事官蔡兆吉稱據千總敖重益報稱朝俸潛逃蘭州黎門鎮避住呈報經理尤副使并報軍門看係叛逆

欽頒賞格有名入犯牌行蔡兆吉即便責差劉學鄧方二
羅金朝傅朝陽董三策等同徒步劉貴朝前去計誘拏獲
朝俸正身前來蔡兆吉審驗是的具由於二十九年二月
十九日呈解兩院俱蒙批按察司審明詳奪又蒙軍門紙
牌案查播賊尚守忠謝朝俸二犯俱係楊應龍用事心腹
賞格有名首惡刦殺飛練東坡龍泉各處皆其督兵主使
罪惡貫盈法當寸斬以謝地方合行招究牌仰按察司即
將二犯逐一研審黨助楊酋叛逆情狀及刦虜軍此民寨
戕殺官兵各項惡跡具招通詳以憑題請施行隨蒙本
司備牌仰府即速具招連人解詳以憑覆審轉詳蒙本府

弔取尚守忠與朝俸到官逐一細加研審蒙審看得謝朝
俸統肆牌數萬生苗窺視平越官兵深入而屠戮尚守忠
管涓潭四十八庄熟識龍泉男婦坐城以待斃二賊固楊
應龍之心膂爪牙也且賞格頒來不肯投降以贖罪海龍
破後竟自逃散以求生朝俸至正月而獲於蔡兆吉之手
守忠至十月而獲於葉定遠之手如此大逆即粉骨碎屍
猶爲晚也何待時哉允宜正法以快人心蔡兆吉葉定遠
擒獲有功相應優敘將謝朝俸尚守忠各擬謀反但共謀
凌遲處死罪名格解到司覆審蒙本司看得謝朝俸尚守
忠的係楊酋心腹賞格有名如殺飛練東坡龍泉等處據

招皆其主使況又統兵親敵慘不可言及至大兵進征不肯降服一見國破又爾潛藏天網不疎逃而復獲審供的確剛斬何辭有功蔡兆吉等仍聽另敘將朝俸等取問罪犯一議得謝朝俸尚守忠俱合依謀反但共謀者律不分首從皆凌遲處死遵候題 請施行爲事官蔡兆吉把總葉定遠及部卒人等有功員役相應優敘餘無照等因具招通詳到臣該臣會同巡按貴州監察御史宋興祖看得播酋自首難以及國破 朝廷費金錢數百萬地方殺生靈數十萬其源皆始於飛練而飛練之禍其端始於謝朝俸尚守忠二兇謝朝俸住四牌而多智酋倚爲謀主守忠

住湄潭而多力酋倚爲梟將僞授統制提調之職巡警江內江外之地一寇飛練再寇東坡三寇龍泉殘躡地方慘不可言都司楊國柱長官安民志又出二兇手刃卽寸斬之不足以謝二官之冤而舒三方之憤者况賞格頒示之後不出投降海龍旣破之後潛竄山林若非各官協擊誘擒恐本惡之鏡梟未必不懷反側而出押之兇虎不可令衆庶見也臣等反復思之脅從罔治而二兇非脅從餘黨可貸而二兇非餘黨則又何愛於二兇不以正 國法而快人心哉蔡兆吉葉定遠擒獲二賊比之在陣手縛者固爲有間亦宜優賞以酬其勞或以二將前平播州別有擒

野史 卷之四 三十四
斬又當通敘陞級復職以旌其伐臣等未敢擅擬既經司
府等衙門審招明白理合具題伏乞 勅下兵部都察
院如果謝朝俸尚守忠情罪相合再加會議上 請行臣
等欽遵查照施行謹題請 旨

請增易 勅書疏

題爲轄地漸增舊 勅未載 請乞增易 勅諭以便統
攝事案照萬曆二十八年六月內臣肅將 天威會蜀楚
兵討平播酋後在吏部咨爲播地蕩平等事該本部題覆
內開白田壩設一府四縣一州隸四川平越設一府四縣
一州隸貴州等因題奉 聖旨俱依擬府名與做遵義平

越州名與做真 黃平縣名與做遵義桐梓綏陽仁懷湄
潭龍泉壘安餘慶欽此又准戶部咨爲逆酋甫平等事該
本部題覆內開行令四川烏撒鎮雄東川烏蒙四府西陽
土官襲替起送四川撫按會同貴州撫按批允方許襲職
仍責烏撒東川二府佐駐鎮本府督催黔餉重慶府管糧
府佐亦要嚴催西陽協濟銀兩各官給由陞遷四川撫按
會同貴州撫按查考錢糧完欠明白方許離任又令湖廣
湖南一道并長沙府屬俱隸貴州撫臣節制若印糧官員
給由陞遷悉照湖北事例申請考覈任內錢糧明白方准
考滿離任等因題奉 聖旨依議行欽此俱經備咨前來

通行欽遵去後該臣查得二十七年九月十六日恭領
勅諭內開載兼制湖廣湖北道所轄辰常靖三府州麻陽
鎮寧九永二守備常德辰州沅州九谿永德施州六衛永
順保靖二宣慰司施南散毛忠建容美等宣慰司算子坪
五寨長官司未及湖南道長沙府也四川東道所轄重
慶二府并各衛所酉陽平邑等土官未及遵義新府衛所
與烏撒鎮雄東川烏蒙各土司也夫 明旨屢下在二省
文武諸臣敢不祇肅第 勅諭未載恐邊氓與諸土夷尚
未盡悉地方遼闊臣無所憑籍難以彈壓錢糧逋負不詳
爲開載難以責成相應具 題伏乞 勅下吏戶二部查

照原議上 請將臣新屬地方一併載入 勅諭 頒賜
新 勅給臣遵守庶 絲綸一布人心自肅督責旣嚴邊
儲日裕矣除新 勅到日另將舊 勅奏繳謹題請 旨

題叅長沙逋餉疏

題爲邊糧積逋軍餉告急議處督催事宜乞 賜允行以
專責成事據湖廣按察司分巡下湖南道副使張天德呈
將湖廣長衡郴等府州縣正徵萬曆二十三年起至二十
四五六七年分額解貴州糧銀完欠分數掌印管糧官員
職名及詳稱帶徵十八九二十二十一年分欠銀內已
完者各官住過俸糧應准開支原欠十四五六七年年分銀

兩內未完者候追另解造冊報臣發行貴州布政司查覈
隨據呈稱弔取本司收銀卷簿磨對完欠數目相同回報
前來覆覈相同除造冊咨部查考外爲照貴州土堵賦寡
衛所官軍俸糧營哨兵士芻餉皆坐派川湖協濟本正供
也邇來長沙府屬秦越異視逋負數多自二十五年查叅
二十二年逋餉之後臣以二十七年入黔值播州皮林二
役戎事倥偬不暇查覈而長沙郡縣兩番運糧以濟楚軍
臣亦念各官有事於戎不暇催科故稍寬其期今二役旣
畢而逋負如故臣不得不執三尺以從查得萬曆二十三
四五六七年湖廣每年該三萬七百二十兩計正徵五年

共該一十五萬三千六百兩除已完并未完一分以上與
事故官員無容瑣陳外如長沙府屬完及六分以上未完
三分以上湘鄉縣見掌印知州李禎先掌印長沙府通判
陞黃州府同知管黃梅縣事今陞工部屯田司員外郎孫
鉉先掌印今丁憂知州史謙先管糧主簿今陞 楚府奉
祠袁銳見管糧主簿李應春長沙縣先掌印知縣今陞貴
州安順州大察調簡知州康阜見掌印知縣黃錙管糧主
簿王立綱善化縣先掌印知縣陞福建延平府通判謝朝
紀見掌印知縣陳弘乘管糧縣丞江仕良以上十一員雖
經管接署又近不同均屬有違 明例卽今軍餉萬分告

急若不照例參治非惟無以懲積習之愆亦恐重脫中之虞參照湘鄉等縣知州等官李禎等因循積習玩視邊儲比徵惟知徇情任從頑民之侵負催科漫不加意遂致額賦之稽延相應具題伏乞 勅下戶部將李禎等備查經管完欠分數照例分別議擬上請定奪施行未完糧銀二萬七百六十五兩責令湖南守巡二道分守湖北道嚴限各該府縣各官上緊催解濟用再照帶徵完欠銀兩印糧官員除去世事故者別難再議如原參二十二年分衡州府屬桂陽州欠正銀一百二十七兩今已全完先掌印知州劉斯原管糧州判方之綱住過俸糧應准開支長

沙府屬欠正銀八千三百六十八兩今長沙湘陰湘鄉瀏陽等縣共完七千一百五十九兩內長沙縣先掌印知縣陞安順州太察調簡知州康阜湘陰縣先掌印知縣今陞南京工部主事陳美帶徵銀數計已完及九分湘鄉縣先掌印今丁憂知州史謹帶徵銀數計完八分原參各官住過俸糧內除康阜史謹見今再參另議外陳美俸糧應准開支未完銀一千二百九兩應令見任印糧官員督催原參二十一年分瀏陽長沙湘鄉湘陰等縣欠銀八千五百五兩今共完七百六十五兩尚欠七千七百四十兩內湘陰縣帶徵計完九分原參官員住過俸糧應准開支其餘

各縣完數無幾見任印糧官員俱應住俸督催原參二十年分瀏陽湘潭長沙湘鄉湘陰等縣欠銀九千四百四十八兩今共完二千九百一十一兩尚欠六千五百三十七兩內湘陰縣完及八分原參官員住過俸糧應准開支其餘各縣見任印糧官員仍應住俸督催原參十九年分湘陰湘鄉瀏陽等縣欠銀三千五百一十一兩今共完一百二十八兩零尚欠三千三百八十二兩零各縣見任印糧官員仍應住俸督催原參十八年分湘鄉縣欠銀一百一十二兩今全未完仍應責見任接管官員督催其長沙府屬原欠十四年起至十七年止糧銀七萬二百餘兩除陸

續完解外該前任巡撫江東之題參未完二萬七百九十九兩遵奉 欽依嚴催湖廣布政司止據各該府縣續解八百二十二兩尚欠一萬九千九百七十七兩蓋由湖廣視爲泛常而參處止於罰俸侵延得計漫無責成黔帑昔已匱乏矧值大兵之後又值大侵大疫束手無策嗷嗷待哺近奉 欽依准動銀三萬兩賑濟黔饑正係前項年分拖欠帶徵銀數更不容緩四川各府州縣協濟貴州銀兩自二十三年起至二十七年止俱已全完例得免參其烏撒烏蒙鎮雄東川四土府自十七年起至二十八年止共欠協濟貴州本色糧米一十二萬六千一百六十餘石糧

銀三萬六千九百一十餘兩西陽司自十九年起至二十
八年止共欠貴州協濟銀三千四百兩新奉查叅之例未
敢遽行惟是近奉 欽依准動前米一十二萬六千一百
六十石前銀一萬兩併賑黔饑臣奉 旨卽行查催亦未
見解報目今黔省軍民延頸前項銀米以救倒懸懇乞
勅下戶部督行湖廣撫按嚴檄該省布政司及湖南湖北
各道督催長沙府縣將未完糧銀先催解三萬兩赴黔賑
饑餘銀二萬九千七百二十四兩一錢九釐立限追徵陸
續起解并催四川撫按檄行該省布政司及川東川南各
道督催烏撒等四土府將未完糧米一十二萬六千一百
六十石銀一萬兩先催解黔賑饑餘銀二萬六千九百一
十兩并催西陽司原欠貴州協濟銀三千四百兩俱勒限
照數追解前來一以接濟貧軍一以急救饑民庶幾 國
家惟正之供不致拖負 皇上拯饑之仁不終雍淤如再
推諉容臣指名叅 題重治謹題請 旨

奏繳播州五司印信疏

奏爲印信事據貴州布政使司呈奉臣案驗遵將發下新
頒印信七顆分發貴陽平越二軍民府黃平餘慶甕安湄
潭龍泉等五州縣俱令於本年九月初一日行使外其貴
陽府舊印一顆并追出黃平草塘餘慶重安白泥五司印

信五顆合行呈送齎繳甕水司原無印信無憑查追等因到臣據此案查萬曆二十九年八月初四日准吏部咨爲播地蕩平等事該本部會同都察院題覆川湖貴總督撫按條議播地改流善後事宜一復郡縣內開於平越設一府黃平設一州涇潭龍泉二處各設一縣甕水重安地方共設一縣餘慶白泥地方共設一縣其草塘容山二司應割隸各縣以上俱改屬貴州統轄其該府州縣并首領司獄倉庫等衙門印記相應移咨禮部照例鑄給貴陽府仍乞加軍民二字以便兼攝等因題奉 欽依備咨前來准此本年八月十八日據承差趙孟儒赴禮部齎到貴陽平越黃平涇潭龍泉甕安餘慶等府州縣印信七顆到臣查驗原封就經發布政司轉發查得貴陽府既領新印其舊印應繳黃平等土司既改爲流原領印信應繳甕水一司原無印信覆查相同今據繳到貴陽府舊印一顆黃平草塘餘慶重安白泥五司印信五顆謹驗封明白應合 進繳謹具奏 聞

請補總兵疏

題爲銅苗警報方張總兵病甚不至懇乞 聖明速賜推補以靖邊圉事萬曆二十九年十月內准兵部咨爲缺官事該本部題奉 欽依會推鎮守貴州兼提督平清等衛

地方總兵官李遇文劄限本年九月二十七日到任備咨
前來臣屢行布都二司差人催促迄今未到卷查本年十
月初二日據清浪叅將王良翰呈據銅仁守備葛如錦報
稱姦徒徐應龍於磐石營一帶苗巢詭詐百出始稱總鎮
標下旗牌繼稱巡城御史又稱王子在巢橫造逆天大言
搖惑諸夷且遍發苗頭免死牌票糾兵攻打營哨恐生大
患等因隨該臣懸賞令葛如錦督同指揮蔣崇賢等將銀
二百兩計賞順苗龍老桶等設法擒出徐應龍呈解到臣
除將本犯發按察司究問外又據葛如錦塘報本年九月
二十五日據鬼砲任民譚必勝報烏難等寨惡苗龍老聰

等殺牛糾兵聲言分投出劫二攻壩帶一攻地耶鬼砲一
攻平頭司城關廂又據磐石營把總蔣崇賢塘報麻舟苗
人龍阿初等在巢宰牛分約千苗為三股出劫清水哨溪
一帶民寨又據振武營百戶何再榮塘報苗頭石老難龍
老餘等參拾餘人為首砍牛糾拽三省叛苗六千戰馬八
九百匹分為三股於二十四日祭旗出巢約攻新營徑劫
烏羅朗溪上下孟溪堡寨乞行令湖廣叅將拜冉御龍等
禁戢等因又據叅將王良翰塘報十月十四日據健步王
萬四報湖川酉陽所轄龍廷沙留等處惡苗龍史保石老
怯等剽牛糾苗萬餘約在歲裏分攻平頭銅仁烏羅印江

思石等處已行令各長官司并移會銅仁府起集鄉兵遇
警堵截等因又據銅仁府報稱各苗臨城出劫日漸猖熾
若不速催總鎮守巡二道赴任屢以重兵彼將愈肆憑凌
終無寧日區區扼海府城難保無虞等因各報到臣除檄
行該參備嚴督內外營哨漢土官兵加謹防禦隄備并催
都司差人速催李總兵赴任去後近據署總兵事參將王
良翰呈奉總兵李遇文手本移稱職庸劣無似謬蒙天
恩遂至總鎮此介胄之極榮大臣之殊遇千載一時頂戴
曷已正當竭駑殫鈍卽時前驅但職先於萬曆二十七年
陞授狼山副總兵二十八年三月初一日奉旨調協守

湖廣沅州地方於時播情孔急職晝夜兼程水陸間關力
疾前進繼而播事完局留征皮林自正月統兵入巢櫛風
沐雨踰高絕險觸瘴深入至於戰陣之間機務種種尤非
職所敢言勞幸而竣事四月奉撤出巢不覺肝經伏火鬱
久陡發遂至嘔血舊疾大舉左目瞶眊幾於失明口乾舌
麻四肢無力一涉舉動便成眩暈祇緣大馬此軀躑躅已
久積勞成病蒙江都御史發下沅州醫官陳梓孟伯調治
竟未全痊八月間奉檄督兵南還十月方到原籍唯是七
千里脩途不便攜醫缺於藥餌前病因而大發卽今耳目
口舌日夜火氣蒸灼面無血色痰結胸次咯不能出嚥不

能下晨夕嗽血惟憑几伏首百計醫藥俱無效驗為照總鎮責任至鉅貴陽當大兵之後不惟安輯一方事關喫緊且小醜跳梁銷萌屢難正惟此時乃職疾在腹心較前轉劇伏枕呻吟安問就道職自諗萬萬不能供職又何敢含糊以誤地方為此合用手本前去貴州總兵府衙門請乞速為轉達俯容職在籍調理等因轉報到臣據此看得銅鎮之苗界在三省嘉靖年間糾結為亂陷城掠地自十九年至二十年兩勤王師始得稍寧平苗之後議設總兵專駐銅仁蓋以苗賊叵測應有重鎮無事則資彈壓有事則急剿伐近據該叅府備節報惡苗肆劫勢甚危急自總

兵李應祥調任遵義之後總兵李承勛改鎮浙江今總兵李遇文又稱病篤難以赴任前項員缺已虛半年勢難久虛伏乞皇上俯念銅仁孤懸惡苗狂逞勅下兵部將總兵員缺速為會推題補嚴限前來供職庶苗賊不肆邊圉攸賴抑臣又有說焉總兵專制一方官稱都督此亦武臣之極榮而臣待罪黔中三年伍易總兵而多不至彼非薄總兵薄貴州也人情欲富地方貧瘠如黔既無以厭其望人情好逸苗賊充斥如黔恐難以安其身故屢推而屢辭者以此然非所以語人臣任事之忠矣臣本書生未諳兵戈卽一切軍旅之事未敢以拮据言勞而三省蟠據

之苗非一手足能辦不能無望於總兵之速來也自今推
補以後如有仍前以地方為辭以疾病托故者容臣據實
參究若得就近選補速令早到一以戢三省交証之苗一
以為萬里孤臣之助臣愚幸甚地方幸甚然非臣所敢必
也至於分巡銅仁副使路雲龍去歲以入 賀行今未復
任分守銅仁參政吳安國已報丁憂今尚未補再乞 勅
下吏部速為銓補并催副使路雲龍星馳復任臣無任懇
乞悚懼之至謹題請旨

經理會疏略係蜀者不書故曰略

題為播地蕩平經制宜定敬陳善後切要事宜伏乞 聖

明採擇以永奠遐方事准川湖貴督臣李化龍會稿內開
准兵部咨為欽奉 聖諭事該本部題條為十事內開一
計善後謂宜亟行督撫衙門備查播州一地某處與某處
連區某地與某地接軫作何分隸某處應設某府某州縣
作何安置某地應置何將作何統轄及一切善後合行事
宜悉心計處所有子遺作何安插空闊處所作何招徠務
令獷悍不毛之地盡入範圍樵馭之中被我衣冠服我聲
教奠安絕徼等因題奉 聖旨元兇既殄凡脅從牽累的
都免窮治流移的招他復業毋許豪強乘機兼併還與優
加賑恤以安新定地方兵馬久戍勞苦酌量應撤的次第

撤還永靖諸苗橫恣逋誅就著撤回兵馬剿處不必待奏
可卽便宜行事軍中一應有功人員俱從公敘來其餘皆
依擬該督撫悉心行欽此備咨到臣隨該臣備行三省撫
鎮司道會議去後各據回覆到臣大畧主於改土設流而
就中經制委曲亦有不能盡一者查得該州地鄰三省然
楚止偏橋路通一線蜀與黔蓋無所不接壤夫蜀無藉於
播黔瘠壤也若乘此時而割播地以附黔則於蜀無損於
黔有裨且臣等別疏又請以楚之四衛竝割附之從此
黔省幅輳得與十二省比長挈大甚爲長便但欲盡屬之
黔則地方千里諸凡締造勞費尚多亦黔所不能堪因議

設爲二府分隸黔蜀庶建邦啓土各自經營成聚成都指
顧可就 皇上廓清之績旣已盡被於三藩而旡幪之仁
又復再造於黔土矣除寬脅從撤兵馬招流移厚賑恤抑
兼併靖橫恣等項凡 明旨所叮嚀而兵部所條議者俱
已陸續舉行及見之後開款目外謹集衆思列爲十二事
進呈 御覽伏乞 勅下部院覆議上 請蚤賜施行等
因會稿到臣該臣看得播州初平臣於二十八年九月內
具黔中善後事宜列爲十二款業已題 請候 旨外第
督臣所言者統言蜀黔二省事而於蜀爲詳臣前所言者
專言黔事而於蜀未備然蜀之川東正臣兼制地方所宜

與黔中竝舉而急行者臣叅詳再四所見相同該臣會同
總督川湖貴州軍務兼理糧餉巡撫四川地方都察院右
副都御史兼兵部右侍郎李化龍巡按貴州監察御史宋
興祖議照前事俱在可行相應題請伏乞勅下部院
查議題覆施行

計開

一復郡縣播州南極牂柯西連棘道東西廣一千二
百二十里南北袤一千四十里漢唐故爲郡縣在川
貴之間亦一都會也至唐乾符間陷於南詔楊端取
而據之今逆會既平相應改土復流以變夷俗及照

黃平爲川貴要區舊設撫苗通判一員列銜重慶駐
鎮彼中在元人已設爲府臣原議亦同近據經理驛
傳道副使尤錫類貴陽府知府劉冠南稱黃平地狹
戶不滿三百城不過二里斗大之域不堪建府若加
一道一叅尤不能堪等情到臣臣以皮林事移營鎮
遠因檄經理道府縣各官同至鎮遠會議該臣看得
黃平褊小止堪建一州以一叅將坐鎮其中將新府
移置平越即屬新鎮道專轄不必另設該道衙門黃
平一州全設湄潭并餘慶設爲一縣草塘并雍水設
爲一縣以上俱屬平越新府至於龍泉司原係石阡

府轄非播州地近以土官失守改流應仍屬石阡府
以上地方相應俱隸貴州統轄伏候

聖裁

一急選調郡縣既復應設正佐官員分理庶務緣地
方初定需人爲急若非掄擇自近亦何濟于目前查
得貴州平越道府州縣諸臣臣已經具題今再四
訪之驛傳道副使充錫類弘濟艱難殄巨寇而聲色
不動馳驚槍攘平播亂而整暇有餘本官原管平越
哨入播成功今當加銜改新鎮道如駕輕車以就平
夷貴陽府知府劉冠南懸魚渝水所至有冰蘖聲擊

姦石頭論事多肝膽語播平之後百萬糧餉皆其銷
筭出內無分毫爽似當加銜調新府以輯鴻鴈以淨
駸駸思州府推官吳天祐施秉縣知縣袁尚紀銅仁
縣知縣陳廷範雷轟電擊於滅賊之時風恬雨霽於
善後之日在吳天祐歷俸四年似當加府同知銜管
黃平州事袁尚紀陳廷範似當加銜管湄潭龍泉二
新縣事平越衛教授劉天益雖係儒官却有吏幹堪
任草塘新縣知縣又查得佐領等官如安南衛經歷
包一鳴堪任黃平州判官龍里衛大平伐司吏目張
大紀定番州木瓜司吏目胡有進思南府沿河司吏

目蔡世福堪任新縣典史皆前征播運未募兵頗効
勤勞者至於新府同知通判推官經歷知事等官應
卽銓補以備各衛駐鎮伏候

聖裁

一設學校平越原有衛學今新府設於平越當改衛
學爲府學教授等官不必另設黃平旣設新州亦當
建學設學正一員新設二縣人民子弟俱附州學龍
泉新縣子弟附於石阡府學則學校旣立振鐸有地
伏候

聖裁

一建城垣夫郡縣旣設必有城垣所以明保障防不
虞也除平越原有舊城不必改造其新縣竝宜城城
竝宜石石少者以磚代其兵備道府衛州縣衙門公
署倉廩庫獄城隍廟演武場與府州儒學 文廟殿
廡齋舍等項俱當以次脩舉而各官一抵地方棲身
爲急衙舍之建尤宜首圖伏候

聖裁

一順夷情播州皆夷也大兵之後爲賊用力者刈夷
蘊崇已無遺種今見在者曰各司土官曰七姓奏民
曰投降夷目皆宜安插得所顧就中情事不同亦宜

分別如八司曰播州真州白泥餘慶草塘黃平重安
容山內安撫二長官六又一司甕水原無印信亦稱
長官又有宣慰同知羅氏此皆世有官號與播並建
者播州長官王積仁白泥下里長官楊正邊子楊通
漢以附播被擒 獻俘此當與楊氏俱滅不待言矣
真州附播多年綦江之破助兵二百著在耳目同知
羅氏與江外五司首起釁端挑怨速禍且具 奏改
流致激應龍之怒殃及墳墓流禍鄰封致有今日之
事海內震動流血千里則諸司者罪之魁也故說者
謂真州宜正其附播之罪而江外諸司宜以起釁絕
之不為無因第 王道如天罰宜從輕賞宜從重真
州當進兵之初率先歸附正副長官各以千人從軍
江外諸司各招兵聚義充黔楚鄉導此輩即不足為
重輕顧一念誠款自應量酌合將真州正長官即為
該州土同知副長官即為該州土判官江外諸司安
撫與正長官即為該縣土縣丞副長官即為土主簿
同知羅氏為新府土知事此則略其大罪錄其微功
且令黜結羶毳之流居然儕于衣冠文物之列諸夷
亦何幸焉伏候

聖裁

考覈給由府官疏

題爲遵例考覈給由有司官員事據貴州布政使司呈行
往貴州按察司并守巡思仁二道咨牒考覈過思南府參
年考滿給由知府陰鎔詞語并重覆結查得本官任內竝
無公私過名增減歷俸月日其保民實政五事弔取先經
本道覈實并蒙撫按閱查過文簿對查俱已脩舉果無虛
冒無礙緣由結報到司據此案照先奉巡撫貴州郭都御
史批據思南府申往本府知府陰鎔關稱本職見年三十
九歲四川成都府內江縣人由官生萬曆十九年八月內
除授南京中軍都督府經歷司都事二十一年三月陞南

京後軍都督府經歷司署經歷事都事二十二年十一月
陞南京宗人府經歷司署經歷事都事二十三年五月
陞南京戶部貴州清吏司署郎中事都事二十六年十月
陞授今職二十七年三月初一日到任二十八年內蒙川
湖貴總督李侍郎敘錄征播功次疏開綽餘治賦之才均
篤急公之義辦軍需則晨昏桔橰甘胼手胝足以若飴督
運夫則暑雨馳驅使轂擊肩摩之如織千里芻糧絡繹諸
營士馬騰歡內陰鎔力固危郡心存報國相應紀錄擢
用又蒙巡撫貴州郭都御史敘功疏開專城五馬司庾一
方雄論風生聚米而山川可料嘉謀電發奏刀而醜髀皆

虛雖徵調餉兵鷲羽未閑於鞫上而折衝樽俎神鉞若躍於腰間內陰鎔賊犯龍泉支持甚艱尤當優賚又蒙偏沅巡撫江都御史敘功疏開標儀岳立幹局風飛賊焰方張疆場有守禦之備國帛告竭區畫見流衍之能相應紀錄敘用又蒙巡按貴州監察宋御史覈功疏開憂切震鄰牖戶之防孔固心先報 國積倉之轉良多內陰鎔郡當逆衝保固獨苦似當紀錄仍加優賚又蒙宋御史復 命疏開御變安民費盡綢繆心力理棼應劇綽餘擘畫才華列薦五次加至三十年正月三十日止連閏實歷俸三十六箇月參年考滿例應給由關府申詳川湖貴總督王侍郎

奉批仰貴州布政司查報又奉巡撫貴州郭都御史批仰布政司查報奉此又蒙巡按貴州監察宋御史批布政司查報蒙此就經備行各該司道考覈結勘無礙又該本司結查得本官父祖妻妾無貪酷再醮例應請 封呈乞考覈具 奏等因呈詳及具造五事總數書揭到臣該臣會同總督川湖貴州軍務兼理糧餉巡撫四川地方兵部左侍郎兼都察院右僉都御史王象乾巡按貴州監察御史畢三才考覈得思南府知府陰鎔器足鎮浮才堪剗劇憫閭閻之疾苦而拮据多方值苗寇之縱橫而金湯孔固稱職既經各司道查結無礙又奉有府州縣正官雲貴兩省

免其赴部之例除行令本官在任接俸管事文冊差人齎
繳并將覈過脩舉實政五事書揭咨報都察院查考外相
應題 請伏乞 勅下吏部再加查覈本官曾經臣等列
薦伍次父祖母妻查無貪酷再醮近例應得 恩典併乞
查酌施行謹題請 旨

